

الفاجومى

الطريق إلى كمشيش

- قضيت شهرين راقداً فى مستشفى المبره بمصر القديمه.
- خطبت « نعمه » أخت مرات واحد زارنى بدون سابق معرفه.
- فى كمشيش فوجئنا بأن وصولنا عمل زويعه من ردود الفعل المتباينه.



obeyikan.com

حوالى شهرين قضيتهم راقداً فى مستشفى المبره بمصر القديمه فى كنف ورعايه الدكتور رزق عبد المسيح اللى هجم ع البيت فى منتصف ذات ليله واخطفنى بعد ما تدهورت صحتى نتيجته للإهمال والضغط العصبى المستمر واحتجزنى فى المستشفى للعلاج بالقوه! - إذا لزم الأمر- لأن قرحة المعده اللى ظهرت أعراضها بشده بعد حفله الصحفيين التانيه كانت بدأت تنزف وأنا لغاية دلوقتى مندهش إزاي وصل خبر مرضى للدكتور رزق!

المهم الشهرين دول حصلت فيهم حاجات كثيره..

فى المستشفى اتعرفت على الدكتور رزق عبد المسيح الشيعى القديم المحبط- بعد قرار القيادات بحل جميع التنظيمات السريه والعمل من خلال تنظيم الاتحاد الاشتراكى.

ومن خلال رزق عرفت إن الإحباط زى اللون متعدد الدرجات وردود الأفعال.. لأن رزق اللى حرمه قرار الحل من العمل الجماعى قدر يحافظ على التوازن النفسى بداخله واستمر يمارس العطاء من خلال مهنته كطبيب بشكل أدهشنى.. كان أول طبيب يدخل المستشفى صباحاً وآخر طبيب يخرج من المستشفى مساءً وكان بينه وبين مرضاه علاقه شديده الحميميه (إذا جاز التعبير) كانوا طول الليل يتكلموا عن رزق وكان لما مريض يتعب فى العنبر بالليل ما يرضاش يخلى حد يسعفه لغاية ما ييجى الدكتور رزق الصبح!

الأهم من كده علاقه بالمرضىين والتمرجيه..

كان بيصرع العنبر يوم الجمعة ساعة الزياره وأثناء فحصه لمريض شفت تمرجى بياخذ فلوس من السزوار.. غمزته.. ضحك وغمزنى يعنى - شايف! - اندهشت من رد فعله. وفى مكتبه سألته:

- إنت شفت اللي حصل؟

قال لى:

أيوه

قلت له:

- وسبته ليه؟

قال لى:

- لأن أنا اللي قايل لهم يعملوا كدة!!

قلت له وأنا مذهول:

- إنت بتقسم معاهم بقى؟!

ضحك وقال لى:

- مش للدرجه دى... المسأله إنه حيسرق حيسرق.. مش لأنه غاوى يسرق لكن لأن مرتبه ما بيغطيش احتياجاته فأنا اتنفقت معاهم يبعدوا عن أدوية وغذاء المرضى وينموا مواردهم من نفحات الزوار اللي حولوها إلى نوع من الفرده! بمرور الوقت.

أيضاً كان فيه طبيب زميل لرزق فى الإحباط اسمه الدكتور عبد المنعم عبيد ودا كان حاطط همه فى القرابه.. كان كل يوم ييجى يشنف أسماعى بالقرابه فى مسرحيه الشرقاوى الحسين نائرا وشهيداً.

وعرفت كمان الدكتور صالح طبيب أمراض النساء العبشى خفيف الظل اللي كان دائماً يقول لى:

- أنا مش فاهم ليه إنت واجع قلبك بالسياسه؟! إنت راجل فنان والسياسه دى مهنة ما فيهاش أى فن.. دى مهنة الكذابين وقتالين القتلا!

مهنة الغايه تبرر الوسيله.

الراجل ده كان عاشق لمهنته وفضل يلح علىّ عشان أحضر معاه عمليه ولاده

يمكن ربنا يهديني وأكتب اللحظة دي.. لحظه ميلاد الحياه اللى هي فى رأيه.. أروع لحظات الحياه.

عرفت كمان جلال.. جه زارنى ومعاه نعمه بدون سابق معرفه.. ارتحت لزيارته وحسيت إنه من بقيه أهلى. وتطورت علاقتنا وخطبت نعمه أخت مراته اللى هو مربيهها هي واخواتها.

جانى كمان بدون سابق معرفه ثلاثه زوار حيسقى لهم تأثير بعد كده فى حياتى وهم - الدكتور على الجنجيهى - سعيد عبد المعطى - طلعت السنجاى.

وبعد خروجى من المستشفى اكتشفت مجموعه من التغيرات طرأت على الشيخ إمام ومحمد على.. أولاً بدأ فؤاد قاعود يحضر كل الحفلات العامه اللى بيحييها الشيخ إمام كمتفرج! أنا شفته فى حفله كلية الحقوق بجامعة اسكندريه بعد ما ألح على طلعت السنجاى إنى اعتبرت ده مبادره مشكوره من فؤاد على طريق إعادته لم الشمل.

التغير الثانى كان مزعج بالنسبه لى لكن ما كانش مخوفنى واتعاملت معاها باستهانته شديده مش عارف ليه لغاية دلوقت؟

فى يوم خروجى من المستشفى لقيت شخص لبلاى بيدعى إنه شاعر وبينتهز أى فرصه عشان يأكد دعواه مثلاً فى استشهاد چيفارا كتب مطرزه فى رثاء الشهيد والمطرزات نوع من القصائد بيبدأ كل بيت منها بحرف من اسم الشخص المقصود بالقصيده حسب ترتيب الحروف فمثلاً الأخ ده كان كاتب فى چيفارا:

ج- الجيم جلد

ى- والياء يا سلام على دا ولد

القصد أنا لاح اكمل القصيده ولاح أقول اسم המשاعر اللبلاى لأن دا شرف ما يستحقهوش (هو فقط معضوض فى شفته عضه رجالى واللى عضه قرص عليه فشرمه دا كل اللى أقدر أقوله عنه).

لقيت الشخص ده قاعد مع الشيخ إمام وجايب له كلام يلحنه على طريقه شفيق
جلال ويارت الكلام دا بتاعه.. لآ.. دا كان جايب قصايد لابن الفارض وابن
الفرارض عندي له مكان جليل ما يقلش عن المتنبي ويبرم التونسي.

لكن ما أظنن إن المتشاعر الأشرم كان جايب كلامه للشيخ إمام يلحنه من باب
مجاملتي أو مشاركتي الإعجاب بسطان العاشقين عمر بن الفرارض.

إذن الجماعه مصممين على خطف الشيخ إمام وإعادة اكتشافه. وأنا مصمم على
عدم تسليمه لهم قبل تفرغه تمامًا من منجم الموسيقى اللي جواه وبعد كده ياخدوه
مبروك عليهم.

وزى ماتقول إن زهرى كان مطلق عليهم وحظى كان راكبهم وكان الإيقاع
السريع للأحداث فى تلك الأيام بيلعب لصالحي.

فبعد حادثه المتشاعر اللبلايى الأشرم بساعات جاني الدكتور على الجنجيهي
ومعاه مدحت مقلد واتفقوا معانا على السفر صباح باكر إلى كمشيش لإحياء حفل
ذكرى استشهاد صلاح حسين.

وكان الترتيب إن إحنا نروح الميعاد ع العنوان سألنا البواب عن الأستاذ مدحت
مقلد فقال لنا نزل الساعه تمانيه سافر على كمشيش وفوجئت بأساير الشيخ إمام
بتهلل وهو بيقول:

- أحسن.. بركه يا جامع.

بتلفت عشان نرجع لقينا فى وشنا الدكتور على الجنجيهي !!

قلت له:

- إنت هنا بتعمل إيه؟

قال لي:

- أنا جاي آخذكم على كمشيش.

ركبنا عربيه بالنفر من موقف أحمد حلمى إلى كمشيش وفي الطريق حكى لى
الدكتور على الموضوع (همسًا بناء على طلبى).

إمبارح عرف شعراوى جمعه بموضوع دعوتنا إلى كمشيش عن طريق شاعر
مخبر فسأل شاهنده أرملة الشهيد صلاح حسين:

- إنتى صحيح عازمه نجم وإمام؟

قالت له:

- أيوه.

قال لها:

- مافيش داعى ولازم تسحبى الدعوه.

قالت له:

- ليه؟

قال لها:

- لأنهم.. لأنهم حشاشين.

قالت له:

- أنا مش ح أقدم لهم حشيش.

وانتهى الموضوع عند هذا الحد إمبارح.. لكن النهاده ما حدش عارف الموضوع
وصل لفين؟

.. وصلنا كمشيش ففوجئنا بأن وصولنا عمل زوبعه من ردو الفعل المتباينه..
الطلبه اللى كانوا فى الاحتفال قابلونا بعاصفه من التصفيق والهتاف وترديد بعض
أغانينا وممثلو الحكومه قابلونا بالتجهم والارتباك الشديد لدرجة إنى سمعت واحد

بيقول:

- إيه اللي جاب دول؟

شاهنده فقط هي اللي جت استقبلتنا ورحبت بينا بينما اختفى الجميع بما فيهم مدحت.. لكن حيروح منى فين؟ سبت إمام ودخلت أدور عليه لقيت - لحش عريض القفا أحمر الخدين ومكرش زى اللي فى شهرها السابع ولا بس هدوم بيضا مشلبته يشرب من عليها العصفور ومشتبك مع مدحت- المرتبك- فى جدل عنيف انتهى بأن قال للحش لمدحت:

- دول لا يمكن يطلعوا ع المنصه.. التعليمات بتقول كده!

سألت يطلع مين للحش ده؟ قالولى دا أمين الفلاحين. أنا تصورت أن ده اسمه أتارى دى وظيفه.. أمين الفلاحين!

قلت له:

- يا أستاذ أمين.. يا أخى عيب داحنا ضيوفكم.. وانتو اللي داعيينا.

قال لى:

- أنا أعرفك متين يا جدع إنت؟ إبعد عنى ما تودنيش فى داهيه.

قلت له:

- طب وحياة أمك لطلع ع المنصه وابقى تعالى نزلنى.

وظاظت الحكايه وأوشك الحفل ع البوظان لولا إن مدحت مقلد طلع ع المنصه ومسك الميكروفون وحياسفير كوبا لحضوره الحفل وقال:

- وبمناسبه تشریف السيد السفير فيه واحد فنان عامل أغنيه عن چيفارا وحيطلع

يقولها!!!!

ووطى على ودنى وقال لى:

- إعمل معروف چيفارا بس.

قلت له:

- ماتخافش.

ورحنا طالعين قايلين حرب الشعب وبعدين قلنا چيفارا مات.. وقلت للناس:

- إحنا حنغنى فى الغيط.. اللي عايز يسمع يبجى ورانا.

ونزلنا من ع المسرح ورانا اكثر من نص اللي فى الحفله وقادنا أحد الفلاحين إلى قاعه واسعه فى البيت قعدنا فيها واتلموا الناس حوالينا وهاتك يا غنا. يقوم ولاد الزوانى يبعثوا ورانا غفر بعصيان يضربوا الناس بحجه تنظيم القعه!

شديت العصايه من واحد منهم قلت له:

- إنت مين قال لأمك تنظم؟.. عارف لو مديت إيدك على حد؟ ح اكسر العصايه

دى على دماغك.

كان قاعد جنبنا- على كرسى طبعًا- ثلاثه ضباط مباحث.. بصيت لهم

وضحكت فقال لى واحد منهم:

- إحنا نجار جلود.

قلت له:

- جلود بشره طبعًا.

بصوا لبعض وضحكوا.

وانتهت حفله كمشيش بعد تصعيد المواجهه وبدأت أستعد لرد فعل السلطه بمزيج

من الخوف والفرح.. الخوف كشعور إنسانى غريزى من بطش السلطان والفرح

بانتصارى عليهم فى معركة الاحتفاظ بالشيخ إمام.

الكلام اللى اتكتب فينا واللى اتقال عنا يلاقف.. لكن أذكى الكلام كان اللى

كتبه الأستاذ محمود السعدنى فى مجله صباح الخير تحت عنوان- أغانى هذا الرجل-

أنا مش ح أناقش رأيه فى الشيخ إمام لكن اللى يهمنى هو رأيه فى كلام الأغانى قال
بما معناه إن الكلمات تتناول أوجاع الناس بأسلوب لاذع بينما شعراء المؤسسه
يكتبون عن هجر احبيب وسهر الليالى وعد النجوم فى عز الضهر.

أما اللواء الطبيب الأستاذ محمد عبد الوهاب موسيقار الأجيال فقال فى صوت
العرب لما سألوه:

- سمعت الشيخ إمام؟

قال:

- أنا ماليش دعوه بالكلام!!

وراح قايل رأيه فى صوت الشيخ إمام وبكده يبقى سيادته ارتكب خطأ فنى
جسيم لأنه افترض وجود أغنيه مافيهاش كلام.

عرفت بقى ليه، لأستاذ رجاء النقاش كان مسمى البرنامج "مع ألحان الشيخ
إمام؟"

